



Nakas kirjapandminõ III Umalõ Pido!

Kirjapandminõ käü 20. novembrini 2012, a soovitami seod tetä' võimalikult kipõlt, selle et III Uma Pido teedüssejagaminõ koorioppajilõ pido laulõ kottalõ om joba novembri algusõn!

III Umalõ Pido kirjapandmisõs pallõmi täütä' registriirmisleht ja saata' meili pääle ursula@wi.ee vai kiräga Võro Instituuti (Tartu 48, Võru 65609).

III võrokeeline laulu- ja rahvapido Uma Pido peetäs maaha 01. juunil 2013 Võro Kubijal. Uma Pido ei olõ' õnnõ laulupido. Uma juuri pääle mõtlõminõ hoit meid üleilmastumisõ tuulõn kaomamineki iist. Tuud kinnütäs ka pido tunnuslausõ', miä kõnõlõs meist ku puust - ku juurõ' omma' kimmält maa seen kinni' ja tüvi tukõv, sõs või ka ladõv rõõmsahe tuulõ käen hinnäst hällütä' ja laulda'!

Nigu innemb katõl kõrral, omma' pido kavan rahvalaulu', rahvaligu' laulu', klassikalidsõ' koorilaulu' ja vahtsõmba kuurõlõ säetü' laulu'. Lauluvara om nuuruslik ja seoilmaaolinõ, a om ka tasalikkõ ja mõtisklõvit laulõ ja pallõmiisi. Pido lavastaja Tarmo Tagametsa idee perrä köüt seokõrdsõ pido ütes Võhandu jõgi, mõtõlus pühäst jõõst ja mälehtüs timäle viidüist andõst.

Pido laulma oodõtas kuurõ edimält Lõuna-Eesti maakundõst, kon kimmäs köüdüs võro keele ja kultuuriga olõman om. A hää meelega omma' mano oodõdu kõik koori', kiä laulu' är' opva' ja võro keelest ja meelest üten lõunaeestlâisiga rõõmu tunda' tahtva' - võrokõisi meelen ja keelen om väke, midä tasos hindäle ligi laskõ'!

Iloist laulumõnno kogo Uma Pido toimkonna puult!

Ursula Zimmermann
ursula@wi.ee
tel 56 98 98 18
www.umapido.ee